

PREDGOVOR

Vidni napredak nauke i tehnologije imao je veliki uticaj na područje medicinskih nauka. Tehnička dostignuća primjenjena u medicini iziskuju potrebu za podizanjem nivoa znanja koji omogućava spoznaju i adekvatnu primjenu tih dostignuća. Kako medicinska sestra direktno učestvuje u primjeni tih dostignuća, na dobrobit pacijenta, o njezinom znanju i iskustvu ovisi koeficijent iskorištenosti ponuđene tehnologije. Savremena koncepcija organizacije zdravstvene njege stavlja medicinsku sestru u centar zbivanja. Dosadašnji nivo obrazovanja medicinske sestre koji je bio limitiran «višom medicinskom školom» pokazao se nedostatan. Sestrinsko obrazovanje se podiže na nivo fakulteta, uvažavajući potrebu praćenja teoretskog znanja praktičnim treninzima.

Posebnu važnost u bolestima koje obrađuje ovaj udžbenik predstavljaju hitna stanja u kojima je vrijeme dragocjen faktor. Pružiti složenu i adekvatnu medicinsku pomoć u kratkom vremenskom periodu može samo onaj ko dobro prepoznaje bolest, vlada praksom i tehnologijom, zna redosljed postupaka i organizaciono je edukovan. Iz svega toga je izrasla potreba da se osnove bolesti, njihov tok i eventualne komplikacije prikažu savremeno, jednostavno i enciklopedijski sažeto. U udžbeniku su pretstavljeni klinički znaci karakteristični za pojedine bolesti kao i postupci koji se najčešće primjenjuju u oboljenjima koji su predmet studije ovog udžbenika. Knjiga »Zdravstvena njega u kardiologiji i pulmologiji« je štivo koje je dostatno za studij zdravstvenih nauka, a svakom zaposlenom na odjeljenjima kardiologije i pulmologije pouzdan i vrijedan vodič kroz taj dio medicine.

AUTORI